

開放文學 – 風土人情 – 殊域周咨錄 第十卷 西北夷考引

家君司右諫時，緝《殊域周咨錄》共二十四卷。門人汪允輩先刻九卷，皆東南夷事。其西北夷十五卷未暇刻也。漸謂國家內順外威，四夷來王。自堯舜以來，盛莫與京。而列番之狼吞虎噬，足為疆場痛毒，我所當儆戒者，南倭北虜而已。備倭方略前刻已詳，而制虜勝策，二百年間臣工建白，廟陛裁定，鑿鑿可行者，寧不廣布寰宇，以為有志籌邊者之一助乎！且家君此書，原為奉命殊域，職掌所繫耳。自景泰中英皇返狩之後。星軺久絕於沙漠矣。而九圍戎政，如兵食功罪，凡當清刷，則省中諸臣，每捧綸音而往焉。雖不身入胡地，而要為防胡計也。嘉靖末，代藩諸宗與大同郡邑生隙，至於圍逼督府，抗拒按院，交章請勦。而家君欽承璽書，驅馳雲中，咨訪所得，有可裨益兵樞消氛瀚海者，條疏欲上，竟以遭謫中止。今置篋中，塵可掬也。其視諸臣之侃侃建白，悉見施為者，何如哉！莫非職事而得行與否，有可慨焉，則是錄也寧可不出之以為有志籌邊者之一助乎！漸乃與汪允等再為檢梓，俾成全書。不惟夷戎蠻狄其詭秘情狀畢露，無遺，而運機決畫以輔有道之盛守在四夷者，亦或取二三策不鄙其陋也。敢並識之！男嚴其漸頓首書。